

## ***Inuit Issittormiut Siunnersuisoqatigiiffiata ICC-ip kikkut ta- maasa juullisiorluarnissaannik ukiortaarsiorluarnissaannillu kissaappai!***

Inuit Issittormiut Siunnersuisoqatigiiffiat ICC ullumikkut inunnut pavani Tunumi samanilu Amerika avannarlermi taassumalu akiani Beringep Ikeraasaata sineriaani Tjukotkami najugalinnut 160.000 missaanniittunut sinniisuuvoq.

ICC tassaavoq Issittumi suliniaqatigiiffinni siullersaalluni sukumiisumik imalimmik *avatangiisit pillugit suleriaasissiorsimasoq*. Taamatullu suliniarnini pillugu ICC ataa-siarani nunat tamalaat akornanni nersornaatisarsimavoq, sulinerli unigani ilaatigut suliniut "Sila-Inuk" silap allanngoriartornerata Nunatsinnut inuinullu qanoq sunniu-teqarneranik nalunaarsuiffiusoq uppersaatissanillu katersuiffiusoq atorlugu inger-laqissaaq. Suliniut taanna aalisartut piniartullu kattuffiat KNAPK qanimut suleqatiga-lugu ingerlanneqarpoq. Suliat tamanut tunnganerusut eqqarsaatigalugu ICC-ip nunat inoqqaavisa pisuussutinik uumassusilinnik atuinissaminnut pisinnaatitaaffiinik illersu-isuujuarsimavoq.

ICC-p nunat assigiinngitsut sisamat suliffigai, taakkulu tamarmik immikkut oqaa-seqarfiupput aammalu Inuit oqaasii assigiinngitsunik sumiorpaluuteqartut atuullutik, tamarmillu immikkut allattaaseqarput naalagaaffinnit assigiinngitsunit nunasiaasima-nermik pissuteqartumik, nunanilu taakkunani inuit oqaaserisaqqaavi takornartat oqaa-siinit qerlerneqarsimapput. Inuit oqaasii *Inuillu kulturiat* nukittorsarniarlugit ICC oqaatsit pillugit ataatsimiititaliorsimavoq sumiorpaluutit ataasiakkaat atorlugit atuak-kiat pissarsiariuminarnerusussanngorlugit latiinerit naqinneri aallaavigalugit assigiim-mik allaasiliortussamik.

ICC-ip ukiorpassuannngortuni Naalagaaffiit Peqatigiinni sulinerata inernera pingaar-neq tassaavoq nunat inoqqaavisa nammineerlutik kikkussusertik sumillu tunuli-aqutaqarnertik aalajangersinnaanngorsimammassuk. Naalagaaffiit Peqatigiinni Nunat Inoqqaavisa Atugaat pillugit Isummersoqatigiiffiup pilersinneqarneratigut uagut silar-suarmi nunat inoqqaavi allat peqatigalugit nunat tamalaat akornanni akuerisaasumik oqaloqatigiittarfeqalersimavugut, tassanngalu *nunat inoqqaavisa pisinnaatitaaffiinik* sulissutiginninnerput nangissinnaavarput.

*Issittumut politikkimik* suliaqarnitsigut Inuit nunaanni sisamaasuni naalakkersuinikkut, aningaasarsiornikkut inooqatigiinnikkullu ineriartornermi sunniuteqaqataanissatsinnut sakkussaqaalersimavugut. Tamanna sorpassuartigut maanna malunniukkiartoq, tassa nunani namminerni aammalu nunat tamalaat akornanni sulinermi, ilaatigullu Issittumi Siunnersuisoqatigiinni aammalu oqallittarfinni allarpassuarni issittumi ajornartorsiutit assigiinngitsut oqaluserineqartarfiini peqataanitsigut.

Tamassi juulliorluarnissassinnik ukiortaarsiorluarnissassinnillu kissaallusi!

Aqqaluk Lynge,  
Siulittaasoq, ICC-Kalaallit Nunaat